


Tebing jalan runtuh cemaskan penduduk



BEBERAPA pekerja kontrak memasang kanvas di kawasan tebing jalan yang runtuh di Bandar Putra Kulai, Kulai semalam.

KULAI - Kira-kira 200 penduduk Jalan Belian di Bandar Putra di sini berdepan detik cemas apabila tebing di salah satu jalan masuk ke kawasan perumahan itu runtuh awal pagi semalam.

Kejadian yang berlaku kira-kira pukul 3 pagi itu mengejutkan penduduk apabila terdengar bunyi letupan kuat akibat tembok penghadang tanah di situ runtuh.

Lebih membimbangkan apabila kawasan runtuh berlaku hanya 0.5 meter dari kediaman penduduk.

Seorang penduduk, Sarinah Mohd. Sahar, 44, berkata, dia mengetahui kejadian itu kira-

kira pulak 7 pagi semalam selepas dimaklumkan jirannya.

"Jiran memberitahu mereka terdengar bunyi kuat dipercayai runtuh kira-kira pukul 3 pagi menyebabkan ramai yang terjaga.

"Walaupun lokasi kejadian jauh dari rumah saya tetapi kejadian ini mengejutkan," katanya ketika ditemui di sini semalam.

Difahamkan, beberapa penduduk sebelum ini telah melaporkan kepada pemaju berhubung kewujudan satu lubang besar berdekatan kawasan runtuh itu.

Kemungkinan juga kejadian tanah runtuh berlaku akibat kebocoran paip di dalam tanah,



SARINAH

Sementara itu, Pegawai Operasi Balai Bomba dan Penyelamat Bandar Putra, Pegawai Bomba Kanan II Mohd. Nasib Mohd. Sam, berkata, pihaknya menerima panggilan daripada orang awam pada pukul 7.40 pagi.

Menurut beliau, pemeriksaan di tempat kejadian mendapati, berlaku runtuh tanah kira-kira satu meter daripada sebuah rumah di kawasan itu.

"Kita sudah memaklumkan kejadian ini kepada pihak pemaju dan mengarahkan mereka membuat kepungan di kawasan tersebut.

"Ketika ini kita juga menempatkan anggota bagi menjalankan pemantauan berterusan," katanya.